

## Ino Palunguwa Turakki Juan Ino Mapeafu Sitawa Turak

Ino nanurak sitaw, i Juan a tata a adalani Jesus a nebulun sikwana sin nagananna sito lubag. Netura'nga yaw sino manguruwira a nagan sino palulubbunna Asia Menor. Lakayin sin nanurakkanna sitaw.

Ino gafuneno niturakkanna taw, se agyanin nekatwayira sino nanguruwira a nanulduwera si bakkanna gakkurug mapeafu ki Jesu Kristo. Netuldura si amminira a ana sito lubag, nalamitanira si narakkat. Antu gafuna, amme kanu nabbaliyi Kristo si gakkuruwa tolay. Netuldura kappay si i Jesus, bakkannino Mesias onnu Kristo a Abbingi Dios. Bakkampelangino netuldureno nabbakabakkan, nu ammena kappelurino akwanda, se sinapi'da si massiki amme talekkuranino manguruwireno liwa'da ana massiki ammera makkaaanggam, nalawaggepay.

Antu gafuna, sina'daggani Juan sino mabbasera sitaw si i Jesu Kristoweno Abbingi Dios a nabbali si tolay. Nepipidwana kappaya nassapit si ino tolaya manggam ki Dios, anggamma kappenaddino bafulunnera ana tuntulanna naddino tunira i Dios.

Ooddu peneno mabasa sitawa mappaanggam sino nakantama mangurug: ino kakka'bawa agganggammi Dios sikwatam, ino akwantammad ta madalusanino ammina rakkattam, ino akwantammadda mangaffut sino ana sito lubagga kumontara ki Dios, andino pangammuwan-tam si ana sikwatamino biyaya manayun.

Ino Bagga'na Yaw

Ino gafuneno turak 1:1-4

Ino pattalaginarantam sino baggaw onnu sino lammuk  
1:5-2:29

Ino nalawara biyayino abbingira i Dios 3:1-10

Ino pakkaaanggammanino abbingira i Dios 3:11-24

Ino pangammuwan sino gakkurug anda sino bakkanna gakkuruwa tuldu 4:1-6

Ino agganggammi Dios andino agganggammino matalaginad ki Dios 4:7-5:5

Ino pita'dagganda si Abbingi Diosi Jesu Kristo 5:6-12

Ino dama a ammuwanino manguruwira sino Abbingi Dios 5:13-21

### *Ino Sapita Manga'da Si Biyaya Mannayun*

<sup>1-2</sup> Sitawa turak, aneno sapitammi sikwayu mappeafu sino mingngan si Sapit. Antuwi Jesu Kristo a manga'da si biyaya mannayun. Agyanin ki Dios a Amana sin liyekepaya napatatu yo lubag, udde nabbali si tolay sin nappaitanna sito lubag. Antu gafuna, initamingke, dinninggammiyeno dami'na, anna inappangammi kappay. <sup>3</sup> Ituldumi inayira a initami anna dinninggammi takesi mesapakkayu pay sikwami sino kebulunammi ki Dios a Ama anni Jesu Kristo a Abbingnga. <sup>4</sup> Itura'miyera yaw takesi maanggammetamungke.

### *I Dios, Kunnangke Sirwat*

<sup>5</sup> Inaya dinninggammi sino Abbingi Dios, antuweno ipakaammumi sikwayu: i Dios, kunnangke sirwat, se awaningke lammuk sikwana. <sup>6</sup> Nu kuntam si mebumbulunetam ki Dios, gampade mangwetangkepaysi narakkatta kunnangke agyanetangkepaysino lammuk, massisiriyetam, se ammena mekunveno akwantam sino kakuruwan. <sup>7</sup> Udde nu matalaginaretam sino baggawa kunna payino akwani Dios, nalawarino abbafaruluntam annino buluntamira a mangurug, anna maunafan amminino liwattam gafu sino ada i

Jesus a Abbingnga. <sup>8</sup> Nu kuntam si awana liwattam, sinsiriyantamino baggitamungkepay, e ammena gakkuruwino dinandantam. <sup>9</sup> Udde nu ipunnutamino liwattamira ki Dios, pakomannenaya liwat anna dalusandetam sino ammina rakkattam. Matalakki Dios a mangwa si kunnenoy, anna naggaddang nu akwanna, gafu sino natayani Kristo. <sup>10</sup> Nu kuntam si ammetam nalliwat, pabbalintami Dios si sariyon, e awanino sapi'na sino nakantam.

## 2

### *I Kristoweno Mangita'dag Sikwatam Ki Dios*

<sup>1</sup> Ikkayuwa abbingku, neturakkuwera yaw sikwayu takesi ammekayunnad malliwat. Udde nu wara makaliwat, ana i Jesu Kristo a awaningke liwa'na a mangita'dag sikwatam ki Dios a Ama takesi mapakomanino malliwat. <sup>2</sup> Se i Kristo, nakastigu gafu sino liwattamira takesi mapakomanira, e bakkampelangino liwattam, nu ammena lurino liwat ammina tolay.

<sup>3</sup> Antuweno pangammuwantam si ammutami Dios, nu akwantam amminino tunnera. <sup>4</sup> Nu wara massapit si ammuna i Dios, gampade ammena akwanino tunnera, massisiri inay anna awan sikwaneno kakuruwana tuldu. <sup>5-6</sup> Udde ino mangwa sino sapiti Dios, gakkuruwingke ino agganggamma ki Dios. Nu wara massapit si nesapat ki Dios, tuntulanna naddi Jesu Kristo. E nu antuwenayino akwantam, antuweno pangammuwantam si gakkuruwingke a nesapatetam ki Dios.

<sup>7</sup> Ikkayuwa iiddukangku, bakkanna bawuwa tunino iturakku sikwayu, se kiyad sin nanguruwandaw ki Jesu Kristo, dininggaddawino tuna massapit si makkaaanggammetam. <sup>8</sup> Udde kunnangke bawu kappay inaya tun, se neyakkurug sino biyayi Jesus e antu

kappayino akwandaw ingkein. Gafu so kunnenoy, kunnangke mawawanino lammuk se nawaldanetam sino gakkuruwingke a sirwat.

<sup>9</sup> Ino massapit si anen sino baggaw, gampade kalussoneno kola'nga si angnurug, ana kepay si lammuk.

<sup>10</sup> Udde ino manggam sino kakkola'ngera, mattalaginad sino baggaw, e awaninna paggafuwanna a malliwat.\*

<sup>11</sup> Udde ino makkalussaw sino kakkola'ngera, ana kepay si lammuk. Meamparig si mallakad sino lammuka ammena inammuweno ira'bunna se nepallappattino lammuk.

<sup>12</sup> Nanurakkak sikwayuwa aanakku gafu se napakomanino liwa'dawira gumafu ki Kristo.

<sup>13</sup> Nanurakkak sikwayuwa lallakay gafu se inammuwandawi Kristo a naganin sin awangkepay yo lubag. Nanurakkak sikwayuwa bafuwanak gafu se inaffu'dawi Satanas.

<sup>14</sup> Ipidwaka sapitannino gafuneno nanurakkanku sikwayu. Nanurakkak sikwayuwa abbingku gafu se ammuyunni Dios a Amatam. Nanurakkak sikwayuwa lallakay gafu se ammuyunnino naganin sin awangkepay yo lubag. Nanurakkak sikwayuwa bafuwanak gafu se natuyaggino angnuruddaw, mattalaginarino sapiti Dios so nakandaw, anna inaffu'dawi Satanas.

<sup>15</sup> Ammeyu anggammanino gagangena tolay sito lubagga makkontara ki Dios andino ana sito lubag, se nu antuweno panggammandaw, awana aggangandaw ki Dios a Ama. <sup>16</sup> Se ammina narakkatta ana sito lubag, a kunnangke ino narakkatta panggammanino tolayira, ino gagangera a minga'run si ammina maitara, annino pas-sangele'da sino ana sikwara, bakkanni Dios a Amatamino

---

\* 2:10 2:10 Adwa kappayino anggamma sapitanna yaw sino dami'na Griego: 1) ...awan sikwaneno palliwatanino bulunna; 2) ...awana palliwatanna sinay.

naggabwatanda, nu ammera lud naggabwat sito lubag.  
<sup>17</sup> Iyo lubag annino ammina narakkatta panggammanino tolayira, mawawanira ammin, udde ino mangwa sino panggammani Dios, mabiyag si makkikiyad.

### *Ino Kumontarera Ki Kristo*

<sup>18</sup> Ikkayuwa anakuwera, ara'niyennino puliyani Kristo. Naammuwandaw si aneno gumamwang abbuwa kumontara sikwana. Sitoya, inodduwennino kumontara sikwana, e antuweno pangammuwantam si ara'niyennino puliyanna. <sup>19</sup> Ira a kumontara, neamungira sikwatam si'in, udde bakkannira a gakkuruwa buluntama mangurug, antuweno nekatwayira. Nu gakkuruwa buluntamira, ammera nad nekatway. Udde urayi Dios ino nekatwayanda, takesi maita si bakkannira a gakkuruwa buluntam.

<sup>20</sup> Udde ikkayu, ana sikwayuweno Espirituwi Dios a neya'da i Kristo, e antu gafuna, ammuyu amminino kakuruwana tuldu. <sup>21</sup> Ino gafuneno nanurakkangku sikwayu, bakkannino ammeyu nangammuwan sino kakuruwan, nu ammena lud gafu se inammuyun, e ammuyu kappay si awaningke a siriya maggabwat sino kakuruwana tuldu.

<sup>22</sup> Inya mantuweno massisiri, nu bakkampelangino massapit si i Jesus, bakkannino Kristo a dinunduni Dios? Ino massapit si kunnenay, antuweno kumontara ki Kristo, e bakkampelangino Abbingi Diosino ammayanna, nu ammena kappeluri Dios a Amana. <sup>23</sup> Se ino massapit si bakkanna Abbingi Diosi Jesus, ammena kappay dama a mesapat ki Dios a Amana. Udde ino massapit si Abbingi Diosi Jesus, mattalaginad ki Dios a Amana.

<sup>24</sup> Ita'daddomantuweno kakuruwana tulduwa nadingngaddaw kiyad sin nanguruwandaw. Se nu antuweno akwandaw, mattalaginaggayu ki Dios anna ki Jesus a

Abbingnga,<sup>25</sup> se antu keneno biyaya mannayuna nekariyi Kristo sikwatam.

<sup>26</sup> Neturakkuwerenay mapeafu sino tolayira a manggamma mamalabali sikwayu. <sup>27</sup> Udde amruk si kanayuna ana sikwayuweno Espirituwi Dios a neya'da i Kristo, e ammeyu mawag si korwana manuldu sikwayu. Se itulduna sikwayuweno ammina maawaddawa ammuwan, e gakkurug ammina sapitanna. Antu gafuna, kuruwandonaddino itulduna ta mattalaginaggayu ki Kristo.

<sup>28</sup> Kunnantu, ikkayuwa aanakuwera, mattalaginaggayu nad sikwana, takesi awana pattalawantam anna kaatallantam naso puliyanna. <sup>29</sup> Ammuyu si naggaddangngi Dios,<sup>†</sup> e antu gafuna, ammundokappenad si abbingira i Diosino ammina mangwa si naggaddang.

### 3

#### *Ino Abbingira I Dios*

<sup>1</sup> Dandammantamino dokalla agganggammii Dios sikwatam, se gafu sino aggiddu'nga sikwatam, nebilandetam si abbingnga, e gakkuruwa abbindetam. Udde ino ammera mangurug, ammera maimunuwan si abbindetami Dios, se ammera kappay ammuwi Dios a Amatam.

<sup>2</sup> Ikkayuwa iiddukangku, abbindetami Dios sito ingkein, udde ammetangkepay kura inammuweno pabbalinantamma. Udde ino ammutam, nanu muliyi Kristo, mekUNETAMMA sikwana se maitatamma si nalawad. <sup>3</sup> Kadda tolaya minnanama si kunnanay, talekkuranda ammina narakkat ta nalawad ammina akwanda a kunna payi Kristo.

<sup>4</sup> Nu inyeno malliwat, sulyatanneno lintiyi Dios, se ino liwat, antu kappayino sumulyat sino lintig. <sup>5</sup> Ammuyu si

---

<sup>†</sup> 2:29 2:29 Ino tata kappay anggammii sapitanna yaw: ...naggaddangngi Kristo...

inangngi Kristo sito lubag ta ariyanneno liwatino tolayira, e damana akwan, se awaningke liwa'na. <sup>6</sup> Kunnantu, nu inyeno mattalaginad ki Kristo, ammena aggeliwaliwat. Udde ino tolaya aggeliwaliwat, ammena inammuwi Kristo se ammena mangurug sikwana.

<sup>7</sup> Ikkayuwa anakkuwera, ammekayu pabalabali so mas-siki sanna a tolay. Ino kanayuna mangwa si nalawad, naggaddangnga tolaya kunna payi Kristo. <sup>8</sup> Udde ino aggeliwaliwat, tolayi Satanas, se i Satanas, gagangayinna nalliwat kiyad si'in. Antuweno gafuna a inangngino Abbingi Dios sito lubag, takesi darallanneno akwani Satanas. <sup>9</sup> Ino gakkuruwa abbingira i Dios, ammera aggeliwaliwat, se ana sikwareno nakammi Dios. Gafu se i Dios ino nabbali si Amara, ammera dama a aggeliwaliwat. <sup>10</sup> Kunnayawino pimunuwantam sino abbingira i Dios andino abbingira i Satanas. Ino tolayira a amme mangwa si nalawad anna amme manggam sino kakkola'dera, bakkannira a abbingi Dios.

### *Ino Aggangantam Sino Bafuluntamira*

<sup>11</sup> Antuyawino kakuruwana tulduwa dinginggaddaw kiyad sin nanguruwandaw: makkaaanggammetammad. <sup>12</sup> Ammetammad tuntulannino inangwa i Cain, se i Cain, tolayi Satanas, e pinapateneno kola'nga. Ansanna lang pinapatay? Gafu se narakkattino aggangwana, e nalawarino aggangweno kola'nga.\* <sup>13</sup> Antu gafuna, kakkolak, ammekayu nad makka'baw nu kababannad-dakayuweno ammera mangurug. <sup>14</sup> Udde massiki tan nu kunnenoy, se ammutam si ammetam mekatway ki Dios a bakkanna kunna si'in, nu ammetam lud maa'dan si biyaya mannayun. Ammutam si gakkuruwinay, se anggantamino kakkolattamira a mangurug. Udde ino

---

\* 3:12 3:12 Nu anggammuwa basanino istoriya mapeafu sikwara Cain anni Abel, itannu sino Genesis 4:1-8.

ammena manggam sino kasittolena, kunnangke natekepay se nekatwekepay ki Dios. <sup>15</sup> Se ino makkalussaw si kola'nga, kunna kappayino gumapapatay, e ammutam si ino gumapapatay, awan sikwaneno biyaya manayun.

<sup>16</sup> Ino pangammuwantam sino gakkuruwa agganggam, neya'da i Kristoweno biyangnga para sikwatam. Antu gafuna, ikkanetangkappay, midadanetammadda manga'da sino biyaddam para sino kakkolattamira. <sup>17</sup> Udde ino tolaya warawara sikwana e inammuna si aneno kola'nga a kurangino awanna e ammenangke kallakkan, wara kad agganggamma ki Diosino kunnenay? <sup>18</sup> Ikkayuwa anakuwera, ammetam pelang sapitan si anggantamino kakkolattamira, nu ammetam lud ipaiteno gakkuruwa agganggantam sikwara gafu sino nalawara aggangwatam.

<sup>19-20</sup> Nu kunnenayino akwantama makkaaanggam, antuweno pangammuwantam si gakkuruwa nesapate-tam ki Dios. Massiki nu paliwatandetamino nakan-tam, damatama passiyannakkannino nakantam takesi am-metam maatalla makkararag sikwana. Se ammutam si dokallino aggikallakki Dios amma sikwatam, se am-muna ammin. <sup>21</sup> Kakkolak, nu ammeretam paliwatannino nakantam, awana talotama uma'lang ki Dios. <sup>22</sup> Massiki sanneno arangngantam sikwana, iya'dana se tuntu-lantamino tunnera anna akwantamino panggammana. <sup>23</sup> Antuyawino netunna sikwatam: manguruwetammad ki Jesu Kristo a Abbingnga anna makkaaanggammetam, se antu kappayino netuni Kristo sikwatam. <sup>24</sup> Ino manuntul sino tunira i Dios, mattalaginad ki Dios anna mattalag-inabbayi Dios sikwana. Ino pangammuwantam si mat-talaginari Dios sikwatam, ana sikwatamino Espirituwa neya'dana.



## 4

*Ino Pimunuwan Sino Gakkuruwa Tuldu Andino Siriya Tuldu*

<sup>1</sup> Ikkayuwa iiddukanku, ammekayu mangurug sino amminira a massapit si gumalabbunira i Dios, nu ammeyu abbu dalodawan nu gakkuruwa naggabwat ki Diosino sapitanda, se odduwerana massisiri a massapit si gumalabbunira i Dios a nesinasinak sito lubag. <sup>2</sup> Kunnayawino pimunuwandaw nu ino Espirituwi Diosino naggabwatanino ituldura: nu sapitanda si i Jesusino Kristo a nabbali si tolaya inang to lubag, ino Espirituwi Diosino naggabwatanna. <sup>3</sup> Udde nu ammera sapitan si i Jesusino Kristo a nabbali si tolay, bakkanna Espirituwi Diosino ana sikwara, nu ammena lud mekunveno nakanda sino Kumontara ki Kristo a diningngaddaw si'in si gumamwang. E kunnangke ginamwangin, se antuweno mifuyut sino manulduwira si mekontara ki Kristo.

<sup>4</sup> Udde ikkayuwa anakkuwera, abbindakayuwi Dios, e inaffu'dawino massisiriyera. Se natuyaggino Espirituwi Dios a ana sikwayu amma ki Satanas a matturay sikwara a ammena mangurug. <sup>5</sup> Ino manulduwera si siri, tuntulandeno aggangweno bulundera a ammera mangurug ki Dios, e ino ituldura, mekunna sino akkakokwara, e antu gafuna, anggammino ammera manguruwa maningngag sikwara. <sup>6</sup> Udde ikkanetam, abbindetami Dios, antu gafuna, ino manggammira a maningngag sino ituldutam, ireno bafuluntama nangammu ki Dios. Antuweno pangammuwantam sino gakkuruwa tulduwa naggabwat sino Espirituwi Dios andino siriya tulduwa naggabwat ki Satanas, se nu naggabwat sino Espirituwi Dios, amme anggamma dingngaggannino ammera mangurug.

*Ino Agganggammi Dios*

<sup>7</sup> Ikkayuwa iiddukanku, makkaaanggammetammad, se i Diosino paggabwatanino agganggam. Kunnantu, ino manggam sino kakkola'ngera, abbingi Dios a nangammu sikwana. <sup>8</sup> Udde ino tolaya awana agganggamma sino kakkola'ngera, ammena ammuwi Dios, se i Dios, gagan-gena a manggam si tolay. <sup>9</sup> Kunnayawino nipaitanna sino agganggamma sikwatam, dinundunneo tatatata ke a Abbingnga sito lubag takesi maa'danetam si biyaya mannayun gafu sikwana. <sup>10</sup> Antuyawino kakuruwana agganggam, bakkannino agganggantam ki Dios, nu ammena lurino agganggamma nepaita i Dios sikwatam sin nanundunanna sino Abbingnga a mewa'lat ta mapakomanino liwattam.

<sup>11</sup> Ikkayuwa iiddukanku, nu kunnenoyino inangwa i Dios a manggam sikwatam, makkaaanggammetam penad. <sup>12</sup> Se massiki nu awana tolaya nakaita ki Dios, nu makkaaanggammetam, mattalaginari Dios sikwatam, e maitengke sikwatamino agganggamma a awana kurangnga.

<sup>13</sup> Antuyawino pangammuwantam si mattalaginaretam ki Dios anna mattalaginabbay sikwatam, neya'daneno Espirituna sikwatam. <sup>14</sup> Ikkami pay, initamiyi Jesus, antuweno damamiya ita'dag si dinunduni Diosino Abbingnga sito lubag takesi antuweno misalak si ammina tolay. <sup>15</sup> Massiki sanna a tolaya mita'dag si i Jesusino Abbingi Dios, mattalaginad ki Dios e mattalaginabbayi Dios sikwana.

<sup>16</sup> Ikkantama mita'dag ki Jesus, ammutamino agganggammi Dios sikwatam e antuweno talakkantam. Gagangayi Dios a manggam si tolay. Antu gafuna, ino tolaya manggam ki Dios andino kasittolenera, mattalaginad ki Dios e mattalaginaggappayi Dios sikwana. <sup>17</sup> Nu kunnenayino biyaddam, madadaggananino agganggan-

tam kiyad si awana pakkuranganna, e awanna a patta-lawantam so awa pangukumani Dios si ammina tolay, se ino aggangwatam sito lubag, mekunna sino aggangwa i Kristo. <sup>18</sup> Gafu se anggandetami Dios, ammetammad mattalawa makastigu, se ino agganggamma awana kurangnga, affutanneno talaw. Antu gafuna, ino tolaya mattalaw gafu se aggadandammanneno kastiguwi Dios, ipaiteno talona si kurang kepayino agganggamma.

<sup>19</sup> Anggammantami Dios se inanggammandetam. <sup>20</sup> Nu wara massapit si anggammanna i Dios, gampade kalussoneno kola'nga, massisiri inaya tolay. Se nu awana agganggamma sino kola'nga a aggitanna, ammena dama si anggammanna i Dios a ammena inita. <sup>21</sup> Antuyawino netuni Dios sikwatam: ino manggam ki Dios, anggammanna penaddino kakkola'ngera.

## 5

### *Ino Pangaffutanino Manguruwira Sino Kumontarera Ki Dios*

<sup>1</sup> Massiki sanna a tolaya mangurug si i Jesusino Kristo a dinunduni Dios, abbingi Dios. E ino manggam sino ama, anggammanna kappayino abbingngera. <sup>2</sup> Antu gafuna, nu anggammantami Dios anna akwantamino tunnera, antuweno pangammuwantam si anggamman-tangkappayino kakkolattamira a abbingnga. <sup>3</sup> Se ino gakkuruwa agganggantam ki Dios, antuweno pangwantam sino tunnera. E ino tunnera, ammena madyata akwan, <sup>4</sup> se massiki sanna a abbingi Dios, kanayuna affutanneno ana sito lubagga kumontara ki Dios. E ino pangaffuttam, antuweno angnguruddam. <sup>5</sup> Se awana makaaffut sino ana sito lubagga kumontara ki Dios, nu bakkampelangino mangurug si i Jesusino Abbingi Dios.

### *Ino Mamakurug Si I Jesus, Abbingi Dios*

<sup>6-8</sup> Sin inangngani Jesu Kristo sito lubag, aneno tal-luwa pamakurug si antuweno Abbingi Dios. Ino tata, antuweno nappabawtisaranna si danum. Udde bakkampelangino nappabawtisaranneno pamakurug, nu ammena kappelurino adana a nebubbu so natayanna. Ino mekatallu, antuweno Espirituwi Dios, a gakkurug ammina sapitanna. Inaya talluwera, nakkakarunneno pamakuruwanda mappeafu ki Jesu Kristo. <sup>9</sup> Kuruwantangkeneno ita'daggino tolayira, e nu kuruwantam inay, mannanotinna sino talluwera a nepaita i Dios a mita'dag sino Abbingnga, se matalakkino sapitanna amma sino sapi'na tolay. <sup>10</sup> Ino mangurug si i Jesusino Abbingi Dios, matalaginad so nakammeno neta'daggi Dios mappeafu sikwana. Udde ino ammena mangurug sino sinapiti Dios, pabbalina i Dios si sariyon, se ammena kuruwannino sinapi'na. <sup>11</sup> Antuyawino sinapi'na: na'dandetam si biyaya mannayun, e ino Abbingngeno paggabwatanna. <sup>12</sup> Kunnantu, ino tolaya nesapat sino Abbingi Dios, ana sikwaneno biyaya mannayun, udde ino ammena nesapat sino Abbingnga, ammena naa'dan sinaya biyag.

### *Ino Ammutam Mappedu Ki Kristo*

<sup>13</sup> Neturakkuwera yaw sikwayuwa mangurug sino Abbingi Dios kesi ammundawingke si wara sikwayuweno biyaya mannayun. <sup>14</sup> Ammetam maatala makkararag ki Dios, se ammutam si dingngagganna, nu ino ilyawantam sikwana, mekunna sino panggammanna. <sup>15</sup> Gafu se ammutam si dingngagganneno kararaddam, ammutangkapay si iya'dananeno ilyawantam.

<sup>16</sup> Nu wara maitayu si kola'dawa malliwat, ikararadonad ki Dios ta a'danna si biyaya mannayun. Ino

anggangkuwa sapitan, ikararandaw nu ino liwa'na e liwata mapakoman, ino liwata ammena mifuyut sino kastiguwa awana pakkiyaranna. Se ana kappayino liwata ammena mapakoman, e ammek sapitan si antu naddino ikararandaw. <sup>17</sup> Gakkuruwa liwatino ammina narakkatta aggangwa, udde aneno liwata mapakoman a ammena mefuyut so kastiguwa awana pakkiyaranna.

<sup>18</sup> Kunnantu, aneno talluwera a ammutam. Ino palungu, ammutam si awana abbingi Dios a aggeliwaliwat, se imutanni Jesus a Abbingi Dios, e amme dama a ansani Satanas. <sup>19</sup> Ino mekadwa, ammutam si abbindetami Dios, massiki nu i Satanas kepayino matturay si ammin sito lubagga kumontara ki Dios. <sup>20</sup> Ino mekatallu, ammutam si inang sito lubaggino Abbingi Dios e na'dandetam si pannakaammu takesi maammuwantamino kakuruwana Dios. Nesapatetam sino kakuruwana Dios se nesapatetam ki Jesu Kristo a Abbingnga. Antuweno kakuruwana Dios a paggabwatanino biyaya mannayun.

<sup>21</sup> Anakuwera, ammeyu nad kuruwannino massiki sanna a bakkanna kakuruwana Dios.

Ga'dang

Ga'dang: Ga'dang New Testament

copyright © 2001 Wycliffe Bible Translators, Inc.

Language: Ga'dang

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 13 Jun 2022

d27dc212-1a55-5d51-8f9d-54742e300a0f